

Tasiilami qimarnguimmik pilersitsinissamik periarfissat eqqartorneqarnissaat pillugu Naalakkersuisut Kommuneqarfik Sermersuumut saaffigineqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Laura Táunâjik, Siumut)

Akissuteqaat

(Ilaqutariinnermut Naligiissitaanermut Isumaginninnermullu Naalakkersuisoqarfik, Naalakkersuisunut Ilaasortaq)

Siullermeerneqarnera

Laura Taunâjik-up Tasiilami qimarnguimmik pilersitsisoqarnissaanik siunnersuuteqarluni Kommuneqarfik Sermersuumik oqaloqatiginnissuteqarnissamik siunnersuutaa Naalakkersuisut qujassutigaat.

Ukiuni 2014-2017-imi, Naalakkersuisut persuttaasarneq akiorniarlugu siumut isigaluni periusissiaq iliuusissatullu pilersaaruteqarnermi Naalakkersuisut kissaatigaat persuttaasarneq akiorniarlugu suliniutinik ukkataqarnissaq. Soorlu Ukiuni 2014-2017-mi siumut isigaluni periusissiami Iliuusissatullu pilersaarummi takuneqarsinnaasoq, Naalakkersuisut ilisimaaraat maanna qimarnguiit pioreersut arfineq marluusut arnat persutangaanermik eqqorneqarsimasut taakkulu meeraasa, persuttaaffiusoqarfimmiit qimagutinneqarnissaannut qulakkeerinninnermi suliniuteqarfigineqarnerinut naammaginangitsut. Persuttaaffiusumiit arnat meeqqallu qimagutinneqartarsinnaanissaannik qulakkerinnikkusunnerminni Naalakkersuisut kissaatigaat qimarnguinnik nutaanik pilersitsinnaanissaq.

Tasiilami qimarnguimmik pilersinissaq eqqarsaatigalugu Kommuneqarfik Sermersooq aallarnissaammik qanoq iliuseqareersimavoq. Tamanna tunngavigalugu Ilaqutariinnermut Naligiissitaanermut Isumaginninnermullu Naalakkersuisoqarfik ilaatigut Kommuneqarfik Sermersooq peqatigalugu februar qaammat 2016, Tasiilami qimarnguimmik pilersitsisoqarnissaa eqqartorlugu aallarnisaataasumik oqaloqatigiissuteqarsimapput.

Ilaqutariinnermut Naligiissitaanermut Isumaginninnermullu Naalakkersuisoqarfiup Kommuneqarfik Sermersooq nalunaarfigisimavaa Tasiilami qimarnguimmik pilersitsinissamik isumaanik tapersorsorlugu. Kommuneqarfik Sermersooq ilisimatitsissuteqarfigineqarsimavoq naalakkersuisoqarfik qimarnguimmik pilersitsiniarnermi akulerussinnaanngikkallaruni, kisiannili Kommuneqarfik Sermersooq Qimarnguiit pillugit Namminersorlutik Oqartussat Nalunaarutaat nr. 18, 8 december 2004-meersoq naapertorlugu tapiiffigineqarnissamik qinnuteqarnissamut periarfissaqartoq. Aningaasartuutissanut Inatsimmi konto 30.14.29-miippoq, Isumaginninnerup iluani suliniutiginalersaakkanut aningaasat atugassiat. Taakkunanga aamma qimarnguiit ingerlanneqarnerneri aningaasaliiffigineqarsinnaapput.

Ukiuni 2014-2017-mi siumut isigaluni periusissiami Iliusissatullu pilersaarutip timitalersorneqarneranut ilagitillugu qimarguiit pioreersut inerisarneqarnissaat ukkallugu isiginiarneqarpoq. Inerisaalluni sulianut ilagittinneqarput qimarguiit sulisuinik ilinniartitsineq, aammalu qimarnguimmut tunngasunik kisitsisit atorlugit nalunaarsuusiornernik il.il..

Naggataatigut eqqaarusuppara 2016-mi Naalackersuisut Kommuneqarfik Sermersoorlu Tasiilami isumaginninnermut tunngasut unamminarsinnaasut pillugit suleqatigiinnissamik isumaqatigiissuteqarmata. Naalackersuisut naatsorsuutigaat aalajangersimasunik ilinniagallit imminnut akimorlutik iliuuseqarniarneri ilaatigut ilaqutariinni persuttaaneq pinaveersaartinneqarnissaanut iluaqutaassasoq.

Pissutigalugu Tasiilami qimarnguimmik pilersitsisoqarnissaa pillugu Kommuneqarfik Sermersuumut attaveqartoqareermat, tasanilu pilersitsisoqarnissaa pillugu oqallisigineqareermat aalajangiussassatut siunnersuut akuersissutigineqarnissaa innersuussutigineqarpoq.